

खबरां

- प्रधानमंत्री नरेंद्र मोदी होरें सोमनाथ जी दे मंदर दे पुननिर्माण दे 75 बरें दे सिलसिले च आयोजित अमृत महोत्सव समारोह च शिरकत कीती, आखेआ कि स्थाडियां सांस्कृतिक थाहरां सदिएं थमां देसै दी इक बक्खरी पंछान दियां प्रतीक न।
- पच्छिम बंगाल दे मुखमंत्री शुभेंदु अधिकारी होरें बंगलादेश कन्नै लगदे बन्ने पर तारबंदी करने लेई बीएसएफ गी जिमीं मुंतकिल करने दी घोशणा कीती ऐ।
- केंद्र सरकारै विकसित भारत जी राम जी मिशन दी अमल आवरी बारै अधिसूचना जारी करी दिती ऐ। मुख्य भरै च एह कनून पैहली जुलाई थमां लागू होई जाहगा।
- भारती रिजर्व बैंक दी इक रिपोर्ट च दस्सेआ गेआ ऐ कि 2026-27 बरे दरान भारती अर्थ बवस्था दी विकास दर 6 इशारिया 6 प्रतिशत बनी दी रौहगा।
- आई.पी.एल च हुनै कोला किश चिर मगरा पंजाब किंग्स दा मकाबला दिल्ली कैपिटल्स कन्नै शुरू होने आह्ला ऐ, Delhi Capitals नै टास जित्तियै पैहले गेंदबाजी करने दा फैसला लैता ऐ।

<><><><><><>

PM-Somnath

प्रधानमंत्री नरेंद्र मोदी होरें आखेआ ऐ कि भारत अज्ज पूरे आत्मविश्वास कन्नै अगड़े बधै करदा ऐ ते प्रगति दी इस जात्तरा च स्थाडी सांस्कृतिक विरासत नै मती महत्वै आहली भूमिका निभाई ऐ। उनें आखेआ कि स्थाडियां सांस्कृतिक थाहरां सदिएं थमां देसै दी इक बक्खरी पंछान दियां प्रतीक न। मोदी होरें आखेआ कि सरदार वल्लभ भाई पटेल होरें सोमनाथ मंदर दे नमें सिरेआ निर्माण राएं एह दस्सेआ कि भारत शान कन्नै अपनी विरासत दा संरक्षण करदा ऐ। सोमनाथ मंदर दे पुननिर्माण दे 75 बरे पूरे होने दे मौके पर आयोजित अमृत महोत्सव दरान मोदी होरें इक विशेष यादगारी डाक टिकट ते इक सिक्का बी जारी कीता। उनें मंदरै च पूजा-अर्चना कीती ते शिवें दे जल बी ढालेआ। उनें जोर देइयै आखेआ कि सोमनाथ दा गौरवशाली इतिहास असेंगी औने आहलियें पीढियें लेई अपने विरसे दी रक्षा करने लेई प्रेरणा दिंदा रौहगा। इस मौके मोदी होरें 1998 च भारत आसेआ अज्जै दे रोज पोखरण च कीते गेदे परमाणु परीक्षण दा जिक्र करदे होई आखेआ कि नेही उपलब्धिएं कन्नै स्थाडे साइंसदानें दुनिया दे सामने भारत दी क्षमता दा लोह मन्नेआ ऐ।

<><><><><><>

PM-West Asia Crises

प्रधानमंत्री नरेंद्र मोदी होरें पच्छिम एशिया च जारी तनोतनी दे चलदे पैदा होई दिएं कुल संसारी जक्कोतक्की आली परिस्थितिएं दा मकाबला करने ते आर्थिक आत्मनिर्भरता लेई देशवासिं कोला विशेष सहयोग मंगेआ ऐ ते अपील कीती ऐ जे देशहित च अपनी जीवनशैली च बदलाव आहनना।

तेलंगाना च इक जनसभा गी संबोधित करदे होई मोदी होरें कल आखेआ कि पेट्रोल, डीजल दा सर्फे ते सलीके सिर इस्तेमाल कीता जा। घट्टोघट्ट इक बरे धोडी सुन्ना नेई खरीदेआ जा ते ईंधन बचाने लेई कोविड काल आंगर समाधान बैठका लाने दे बजाय आनलाइन या वर्चुअल ढंगै नै ते वर्क फ्राम होम जनेए विकल्पें गी चुनेआ जा। मोदी होरें कारपूलिंग अपनाने, अपनी गड्डी च जाने दे बजाय सार्वजनिक ट्रांसपोर्ट ते मेट्रो बगैरा दा इस्तेमाल करने ते डीजल पेट्रोल आहली गड्डीं दे बजाय इलेक्ट्रिक गड्डीं दा इस्तेमाल करने लेई बी आखेआ। मोदी होरें मुल्खै दे तैयार उत्पादें दा इस्तेमाल करने ते रसैनी हैलें दी थाहर देसी हैलें दा इस्तेमाल करने पर बी जोर दित्ता।

<><><><><><>

### W.B Cabinet Decision

पच्छिम बंगाल दे मुख्मन्त्री शुभेंदु अधिकारी होरें अज्ज आखेआ ऐ कि राज्य सरकारै बंगलादेश कन्नै लगदे बन्ने पर तारबंदी करने लेई सीमा सुरक्षा बल गी जिमीं मुंतकिल करने दा फैसला लैता ऐ। चुनां दे बाद नमीं सरकार बनने दे बाद अज्ज लग्गी दी राज्य मंत्रीमंडल दी पैहली पैहली बैठक च एहू फैसला लैता गेआ ऐ। मुख्मन्त्री होरें घोशणा कीती जे 45एं दिनें दे अंदर-अंदर राज्य दे बन्ने पर तारबंदी लेई बीएसएफ गी जिमीं मुंतकिल करी दित्ती जाह्गा। उनें दोष लाया कि तृणमूल सरकार नै बन्ने पारा घुसपैठ गी बढावा देने लेई बीएसएफ गी जिमीं देने दी कार्रवाई गी रोकी रक्खे दा हा तां जे बन्ने पारा बंगलादेशी घुसपैठिए औंदे रौहन ते उंदा वोट बैंक मजबूत होंदा रवै। मुख्मन्त्री अधिकारी होरे राज्य च केंद्र सरकार दी आयुष्मान भारत सेहत योजना ते केई होरनें योजनाएं गी लागू करने दी बी घोशणा कीती जेह्दे नै हुन पच्छिम बंगाल दे लोकें गी बी केंद्र प्रायोजित इस स्कीम दा लाहू हासल होई सकोग। एह्दे अलावा उनें प्रधानमंत्री फसल बीमा योजना दी बी राज्य च अमलआवरी दा ऐलान कीता जेदे नै हुन उत्थू दे करसानें गी बी मुल्खै दे बाकी करसानें आडर फैयदा हासल होई सकोग। उनें आखेआ जे अज्जै दी बैठक च चुनां प्रचार दरान केंद्री गृह मंत्री अमित शाह हुंदे आसेआ कीते गेदे वायदें दे मताबक स्कूलें दी नौकरी गितै दरखास्त देने आह्लें लेई उम्र च 5एं बरें दी छूट देने दे प्रस्ताव गी बी मंजूरी देई दित्ती ऐ। उनें पिछली सरकार पर संविधान दा अपमान करने ते भारती न्याय संहिता गी लागू नेई करने दा बी आरोप लाया।

<><><><><><>

### T.N Logi Assembly

नमीं चुनी गेदी तमिलनाडू विधानसभा दे पैहले-पैहले इजलास च अज्ज नमें चुनोए दे 100 कोला मते विधायकें गी संगंध चुकाई गेई। नमें नियुक्त कीते गेदे प्रोटेम स्पीकर एम.वी करूपैया होरें इनें सब्भनें मिम्बरें गी औह्दे ते राजदारी दी संगंध दोआई। शपथ ग्रैहण करने आह्लें च तमिलनाडू दे मुख्मन्त्री सी. जोसेफ विजय, राज्य काबिना दे मिम्बर, विपक्ष दे नेता उदयनिधि स्टालिन, साबका मुख्मन्त्री ई-पलानी स्वामी ते ओ पन्निर सेल्वम बी शामिल हे। उंदे अलावा प्रेमलता विजयकांत, सौम्या अम्बूमणी ते गठबंधन दे होर लीडर बी शामिल हे।

<><><><><><>

### G Ram Ji

केंद्र सरकार नै विकसित भारत जी राम जी गरंटी फार रोजगार ते आजीविका मिशन कनून 2025 दी अमलावरी बारै अधिसूचना जारी करी दित्ती ऐ। एहू कनून इस बरे पैहली जुलाई थमां मुल्ख भरै च

लागू होई जाह्ग। ग्रामीण विकास मंत्रालय नै आखेआ ऐ कि हर माली बरे च 125 ध्याडिएं दे रोजगार दी गरंटी देने आहले इस कनून कन्नै देश दे आर्थिक विकास ते अर्थ बवस्था गी मजबूती थ्होग। मुख्य भरै च इस नमें ढांचे दी जमीनी सतह पर लागू करने लेई चालू माली बरे च 95 ज्हार 692 करोड़ रपे दी बवस्था रखी दी ऐ।

<><><><><><>

### IIT-bombay Carbon

केंद्री शिक्षा मंत्री धर्मेन्द्र प्रधान होरें अज्ज आई.आई.टी बाम्बे च एकीकृत कार्बन कैप्चर ते उपयोग संयंत्र दा उदघाटन कीता। उनें संवाददाताएं कन्नै इस मौके गल्लबात दरान आखेआ कि धरती दे बधदे तापमान, जलवायु परिवर्तन ते बधदी कार्बन उत्सर्जन दी स्थिति पूरी दुनिया दे सामने इक बड्डी चुनौती दे रूपै च खड्गोती दी ऐ ते इस समस्या दे हल गितै आईआईटी बाम्बे नै जेहडी एह पैहल कीती ऐ, एह सराहनेजोग ऐ। इस उपलब्धि लेई आईआईटी बाम्बे गी ममारकबाद ते बधाई दिंदे होई धर्मेन्द्र प्रधान होरें घोशणा कीती जे अगले म्हीने फ्रांस च लग्गने आहली भारत इन्नोवटर्स-2026 प्रदर्शनी च इस संयंत्र गी इक आदर्श दे रूपै च रखेआ जाह्गं प्रधान होरें आखेआ कि पैहले बी कार्बन कैप्चर दे केई कामयाब परीक्षण ते प्रयोग होई चुके दे न जिंदे च कन्सेनट्रेशन दी मदद कन्नै कार्बन गी किट्टा कीता गेआ ऐ पर इस नमीं कोशश कन्नै इस कम्मै पर होने आहले खर्चे गी बडा मता घटाया गेआ ऐ। उनें आखेआ जे इस प्रक्रिया दी मदद कन्नै कार्बन डायआक्साइड सवां कैलशियम कार्बोनेट ना दा इक उत्पाद तैयार होग जेदा इस्तेमाल फोलाद, पेंट, सीमेंट उद्योगें च चूने दे विकल्प दे रूपै च कीता जाह्ग।

<><><><><><>

### Gadkari Toll System

सडक, ट्रांसपोर्ट ते जरनैली शिडकें सरबन्धी मंत्री नितिन गडकरी होरें आखेआ ऐ कि मल्टी लेन फ्री फ्लो टोल बवस्था शुरू होने दे कन्नै गै भारत नै टेकनालजी आधारित जरनैली शिडकं दे प्रबंधन दे इक नमें युग च प्रवेश करी लैते दा ऐ। अज्ज नमीं दिल्ली दे मुडंका बकरवाला टोल प्लाजा पर इस उन्नत बवस्था दा उदघाटन करदे होई आखेआ जे पैहले कन्नै टोल प्लाजा पर लग्गने आहले चिर दी समस्या खत्म होई जाह्ग ते प्रदूषण, तेल, पेट्रोल दी बर्बादी ते टैम जाया होने दी समस्या बी खत्म होई जाह्ग। गडकरी होरें आखेआ कि मल्टी लेन फ्री फ्लो दी सुविधा कन्नै 285 करोड़ रपे दे ईंधन दी बचत होग ते हर बरे 81 ज्हार टन कार्बन डायआक्साइड उत्सर्जन च कमी औग। उनें आखेआ कि इस प्रणाली कन्नै गड्डिएं गी विजन रोके टोल वसूल कीता जाई सकदा ऐ ते फास्टटैग, आटोमैटिक नंबर प्लेट पंछान तकनीक ते आर्टिफिशल इंटेलीजेंस पर आधारित कैमरें दा इस्तेमाल होंदा ऐ। एहदे नै टोल प्लाजा चलाने पर लागत जेडी पैहली वसूली दी 15 प्रतिशत होंदी ही, हून दडी 3 या 4 प्रतिशत रेही जाह्ग।

<><><><><><>

### India Economy

कुल संसारी हालात दे बावजूद देसै दी अर्थ बवस्था लचीली बनी दी ऐ। अज्ज जारी एसबीआई दी इक रिसर्च रिपोर्ट मूजब 2026-27 आले माली बरे च अर्थ बवस्था च 6.6 प्रतिशत दी दर कन्नै विकास

होने दी मेद ऐ। रिपोर्ट च पिछली मानली बरे दी चौथी तिमाही च असल सकल घरेलू उत्पाद दी बढ़ोतरी तकरीबन 7 इशारिया 2 फीसद रौहने दा बी अनुमान लाया गेआ ऐ।

<><><><><><>

## IPL

आई.पी.एल क्रिकेट च अज्ज पंजाब किंग्स गा मुकाबला दिल्ली कैपिटल्स कन्नै होग। एह मैच धर्मशाला च हिमाचल प्रदेश क्रिकेट एसोसिएशन दे स्टेडियम च हुनै कोला किश चिर मगरा ठीक साड्डे 7 बजे खेडेया जाहगा। दिल्ली दी टीम नै टास जित्तियै पैहले गेंदबाजी करने दा फैसला लैता ऐ। कल रातीं रायपुर च खेड्डे गेदे इक शानदार मकाबले च रॉयल चैलेन्जर्स बेंगलूरु नै मुम्बई इंडियन्स गी 2 विकेटें कन्नै हराया। पैहले बल्लेबाजी करदे होई मुम्बई दी टीमै 20एं ओवरे च 7 विकेटें दे नुक्सान पर 166 रन्ज बनाए। एहदे परते च बेंगलूरु दी टीम नै मैच दी खीरी गेंद पर लक्ष हासल करियै मैच अपने नां करी लैता। कृणाल पांडेया नै सब्भनें शा मते 73 रन्ज बनाए। कल दिने खेड्डे गेदे इक होर मैच च चेन्नेई सुपर किंग्स नै लखनऊ सुपर जायंट्स गी 5 विकेटें कन्नै रहाया।

<><><><><><>

## One India Run

भारती मूल दे अस्ट्रेलियाई एथलीट ओम सतीजा कन्याकुमारी थमां कश्मीर धोड़ी दी 5 ज्हार किलोमीटर आली अल्ट्रा मैराथन द्रौड वन इंडिया रन दे तैहत अज्ज जम्मू पुज्जे। साढे जिला संवाददाता दी रिपोर्ट मूजब 26 जनवरी 2026 गी शुरू होए दे इस अभियान दा मकसद कुश्ट रोग करी प्रभावित बच्चें बारै जागरूकता पैदा करना ऐं हर रोज तकरीबन 50 किलोमीटर दा पैंडा तय करदे होई सतीजा होरें सबनें गी एकता, दया भावना ते समाजी जागयकता दा संदेश दित्ता ऐ। जम्मू पुज्जने पर मकामी बसनीकें उं'दा निग्गा सुआगत करदे होई दबोए-लतडोए दे बच्चें दी मदाद करने ते कुश्ट रोग सरबंधी मामलें पर लोऽ पाने लेई उं'दे जत्तें दी बड़ी मती सराहना कीती।

<><><><><><>

## HP-Accident

हिमाचल प्रदेश च चम्बा जिले दे भटियात इलाके च ककीरा कश इक गड्डी दे खाई च पेई जाने करी 6एं जनें दी मौत होई गेई ऐ ते 2 बच्चें सने 4 होर गंभीर तौरा पर जखमी होई गए न। घायलें गी टांडा मेडिकल कालेज च भर्ती करोआया गेआ ऐ। मरने आलें च 5 गुजरात दे सैलानी हे, जिसलै के डरैवर हिमाचल प्रदेश दे मंडी जिले दा बसनीक हा। चम्बा दे एसपी विजय सकलानी होरें दस्सेआ जे हादसे दे बेल्लै इलाके च बड़ी मती बरखा होआ करदी ही। उनें दस्सेआ जे घटना दे फौरन मगरा बचाव ते राहत अभियान शुरू करी दित्ता गेआ।

<><><><><><>

## Fact Check Op. Sindoor

सरकार नै सोशल मीडिया पर प्रसारत होआ'रदे उस वीडियो दा खंडन कीता ऐ जेह्दे च दावा कीता जा'रदा ऐ कि वाइस एडमिरल ए.एन प्रमोद होरें आखेआ ऐ कि आप्रेशन सिंदूर दे दरान पाकिस्तान नै

भारती ज्हाजें ते ब्हाई अड्डें गी नशाना बनाया हा। पत्र सूचना ब्यूरो पी.आई.बी दी तत्थ जांच इकाई नै इस दावे गी फर्जी करार दित्ता ऐ। पी.आई.बी नै जांच मगरा पता लाया ऐ कि एहू वीडियो पाकिस्तानी नेटवर्क आसेआ डिजिटल तरीके नै एडट करियै लोकें गी गुमराह करने दी मंशा कन्नै तैयार कीता गेदा ऐ। इस चाल्ली होर बी केई वीडियो इनें दिनें सोशल मीडिया पर वायरल होआ करदे न जिंदे च पाकिस्तानी प्रोपगेंडा गी फैलाने लेई केई चाल्ली दे झूट ते गुमराह करने आहली जानकारी फैलाई जा करदी ऐ। फैक्ट चैक दे बाद पी.आई.बी नै आखेआ ऐ कि वाइय एडमिरल होरें ऐसा कोई बयान नेई दित्ता ऐ। पीआईबी नै आम लोकें गी सलाह दित्ती ऐ जे ओहू ऐसे वीडियो पर भरोसा नेई करन ते नां गै इनेंगी अगगे फारवर्ड करन।

<><><><><><>

## IMD-Weather

मौसम विभाग नै वीरवारें धोड़ी देसै दे उत्तर पच्छमी हिस्से च गरज चमक कन्नै तेज ब्हाएं झुल्लने दी पेशनगोई कीती ऐ। जम्मू-कश्मीर ते लद्दाख च बी अज्ज ते कल बक्ख-बक्ख थाहरें ऐन गडा पौने दी मेद दस्सी गेदी ऐ। मौसम एजेसी नै आखेआ जे हिमाचल प्रदेश ते उत्तराखंड च बी कल इस्सै चाल्ली दे हालात बने दे रौहने दे इमकान न।

<><><><><><>